

Komunikadu Imprensa Parlamentu Nasionál
18 Novembru 2014

Karta Primeiru Ministru reprezenta presau polítiku ba servisu Parlamentu Nasionál

Iha 22 Outubru 2014, Meja Parlamentu Nasionál (PN) simu karta ofisiál ida hosi Primeiru Ministru Kay Rala Xanana Gusmão.

Karta ne'e ho intensau atu husu PN hodi la autoriza hasai imunidade membru governu sira ne'ebé hetan alegasaun kriminál maibé seidauk iha faktu provadu, atu bele kontinua hala'o sira nia knaar to'o mandatu remata. Nune'e atividade governativu la'o di'ak, la kloka iha risku sériu ba sustentabilidade governu no governasaun nasaun nian.

Artigu 113 Konstitusaun RDTL define katak, wainhira membru Governu ida akuzadu loloos ba krime, ne'ebé bele simu kastigu iha kadeia boot liu tinan rua nian, tenke para hala'o servisu atu bele foti prosesu. Signifika imunidade membru governu ida automatimente suspendidu, maibe normalmente, tribunal husu autorizasaun ba Parlamentu Nasionál atu hasai membru governu ne'e nia imunidade hanesan akontese ona.

Iha 04 Novembru 2014, meja PN ofisiálmente distribui karta ne'e ba bankada parlamentar sira atu hetan apresiasaun bazeia ba Artigu 114 Konstitusaun RDTL. Iha artigu ne'e define katak la iha Membru Governu ida bele hetan detensaun ka dadur bainhira PN la fó lisensa, esepu ba krime dolozu ne'ebé bele kastigu ho sentensa másimu ba prizaun liuhosi tinan rua no iha "*flagrante delitu*" (kaer ho liman).

"JSMP enkoraja PN atu respeita Konstitusaun RDTL ne'ebe define katak tribunal sira la presiza aprovasaun hosi PN atu komesa prosesu hasoru membru governu ne'ebe akuza ho krime sira ne'ebé kondena ho pena tinan rua ba leten. Iha situasaun hanesan ne'e, membru governu tenke suspendidu automatikamente" dehan Diretór Ezekutivu JSMP, Luis de Oliveira Sampaio.

JSMP hanoin katak artigu 114 Kontituisaun ne'ebé kaer nu'udar referensia legal ba pedidu ne'e la justifikavel tanba artigu ne'e mós difine kedas ona nia esepasaun katak artigu ne'e so bele aplika ba krime sira ne'ebé nia limite masimu la ass liu tinan rua prizaun ka krime ne'ebé laos iha sirkunstánsia *flagrant delitu*".

Tuir Kódigu Penál aplikavel ba krime sira ne'ebé ho natureza korupsaun (krime iha funsaun públiku nia ezersisiu) maioria hatur nia pena abstratu ho tinan rua prizaun ba leten, tanba artigu 114 la relevante atu konsidera.

Mesmu karta ne'e ho katakter "pedidu deit" maibe JSMP fiar katak karta ne'e bele hamosu multi-interpresataun no direje ba konkluzau ne'ebe negative no pratika hanesan ne'e hatur presau politiku ba parlamentu atu lakontribui haforsa sistema judisiariu liu-liu ba komprimisiu estadu atu kombate korrupsaun.

Komisáriu Komisaun Anti Korrupsaun (CAC), Aderito Tilman iha nia intervensaun bainhira hala'ó audénsia ho Komisaun A PN, fó mós nia resposta relasiona ho karta PM nian, katak sé deputadu sira la hasai imunidade membru governu sira nian, tribunál sei la halo julgamentu ba krime sira ne'ebé ho natureza korupsaun no tribunál tenke hein to'o membru governu sira ne'e nia mandatu remata hafoin bele halo prosesu hasoru sira. Komisáriu CAC konsidera, "natureza hosi karta ne'e bele hafoer Timor Leste nia nasaun nia naran iha mundu internasionál kona-ba ita nia prestasaun atu kombate korrupsaun."

Iha tinan 2012, JSMP halo peskiza ba asuntu ne'e no hakerek relatoriu ida ne'ebe lansa ho titulu 'Priviléjiu no Imunidade Parlamentár iha Timor-Leste'. Relatoriu ne'e bele hetan iha ne'e: <http://jsmp.tl/wp-content/uploads/2012/05/Privilejiu-no-Imunidade-Parlamentar-iha-Timor-Leste-Junu-2012-FINAL.pdf>

Atu hetan informasaun liu tan, favór ida kontaktu:

Luis de Oliveira Sampaio, Diretór Ezekutivu JSMP

E-mail: luis@jsmp.minihub.org info@jsmp.minihub.org

Telefone:+670 3323883 | +67077295795

Website: www.jsmp.tl Facebook: www.facebook.com/timorleste.jsmp Twitter: @JSMPtl